

CORPUS CHRISTI - TINAN C

LECTIO - Lc 9,11b-17

TEMA

Iha sentru Solenidade domingu ne'e nian mak selebrasaun kona-ba Maromak ne'ebé fó han ninia povu no liuhusi nia Oan Mane haraik ai-han aas liu no rohan-laek, katak Eukaristia.

Eukaristia katak orasaun hahin no agradesimentu nian, ne'ebé ita diriye ba Maromak hodi simu ninia domin, no atu esprime buat ne'e Eskritura uza liafuan rua: bensan (leitura dahuluk) no agradesimentu (leitura daruak).

Dimensaun rua ne'e liga metin ba malu no tenke horik iha ita-nia moris, atu fó sasin kona-ba domin ne'ebé Kristu iha ba ema sira (Evanjelu).

Solenidade Kristu nia Futar Isin no Raan mak festa Kristu nia AN nian. Bainhira ita foti matan ba Paun no Tua ne'ebé konsagra ona, ita bele dehan de'it: «Nia duni! Ha'u-nia Na'i no ha'u-nia Maromak».

LECTIO - Lc 9,11b-17

Durante ninia ministériu públiku dalabarak Jezús sai bainaka no konvidadu ba festa: nia fahe ema nia hamlaha no hamrook kona-ba hela hamutuk. Hodi fó han ba ema lubun boot ne'ebé rona Nia, nia hakbarak paun uitoan no habosu ema sira ne'ebé fiar iha Nia. Molok habosu sira ho paun. Nia hakonu sira-nia nesesidade kona-ba Maromak; nia rona de'it nesesidade ema sira ne'ebé rona Nia. Milagre mak konsekuensi ida raronak Liafuan nian. No significativu tebes katak atu halo milagre ne'e Jezús husu tulun, ki'ik-oan maibé la'ós insignifikante, husi ninia dixípulu sira; tanba sira entrega ba Nia buat uitoan ne'ebé sira iha, sira haree oinsá Jezús konsege satisfás ema lubun boot ida.

Sarani sira tenke aprende husi jestu sira ne'ebé repete, se hakarak hala'o mandatu sira-nia Na'i nian, tanba iha Eukaristia sira tenke repete nia jestu atu tau matan ba ema sira-nia hamlaha hodi fahe ba sira Maromak nia paun katak Kristu Jezús; no la iha ema ida, ne'ebé rekoñese an nu'udar dixípulu, iha uitoan de'it atu fó, basá natós de'it atu nia ofere se buat ne'ebé nia soi.

Lectio: komprende kona-ba sá mak testu dehan hodi para iha oinsá nia haktuir.

Maski testu konta tuir milagre ida, narrasaun ne'ebé nia sentru mak diálogu entre Jezús no ninia dixípulu sira. Milagre nia benefisiáriu mak ema lubun boot. Maibé sira la husu buat ne'e: sira husik de'it, uluknanai, atu Jezús haklaken Reinu ba sira no kura sira; hafoin dixípulu sira serví sira. Jezús satisfás hamla husi ema sira ne'ebé rona nia mensajen. No paun ne'ebé sira la husu, sai don loos de'it ida, no to'o naresin.

Jezús mantein inisiativa durante epizódiu tomak, menus ida iha inisiu konversasaun nian ho dixípulu sira. Sira hakarak haruka ema sira fila bá uma, hotu tiha evanjeliza sira. No tanba razaun di'ak ida: sira iha de'it ai-han ba sira. Sira iha, loos duni, sentimentu di'ak: sira foti konsiderasaun kona-ba possibilidade atu sosa ai-han ba ema barak. Ho osan hira? Iha-ne'e, sira-nia obediénsia, liufali sira-nia pobreza, mak “suporte” ba milagre: liufali tau iha dispozisaun buat uitoan ne'ebé sira soi, sira, tau sira nia an iha dispozisaun ba Jezús no ba ema lubun boot. Lahó mudansa ida-ne'e iha sira-nia atitude sei la akontese milagre ida.

Milagre ne'e sai evidente de'it ikus ona. Ai-han milagrozu ne'e nia narrasaun tuir modelu ida eukaristia nian. Ba narradór eziste ai-han ida ne'ebé habosu loos duni no la bele lakon: paun ne'ebé Jezús fó bensan no nia dixípulu sira fahe.

Meditatio: aplika buat ne'ebé testu dehan ba moris.

Mistériu ne'ebé ohin motiva ita-nia festa, fundamentál tebes ba ita-nia moris fiar nian. Hanesan mistériu hotu fiar nian, nia haksumik istória domin ida ne'ebé estraordinária: Kristu Jezús la limita nia an atuu saran nia moris mai ita, aleinde moris iha ita-nia leet; Nia bá dook liután, Nia buka, modu ida atu hele nafatin iha isin no klamar, ba ita-nia dispozisaun, bainhira nia bá ona. Maromak nia domin de'it mak bele halo hanesan ne'e! Maromak nia kbiit de'it mak bele iha duni beran maka'as! Nia ne'ebé hadomi liu ita to'o saran nia vida mai ita, kontinua hadomi liu ita hodi hela iha ita-nia dispozisaun; iha paun no tua eukarístiku Kristu sai disponível ba ita-nia hamla no ita-nia nesesidade.

Ohin, Corpus Domini, ita selebra no agradese Jezús nia vontade atu halo buat imposível – no ida-ne'e buat ne'ebé Nia hao – hodi konsege sai ita-nia ai-han normál, ne'e tanba de'it hakarak sai ita-nia tulun no apoiu iha moris loroloron nian.

Jezús nia esforsu atu satisfás ita-nia nesesidade ne'e duni mak Evanjellu ohin nian hakarak fó hanoin mai ita; hodi hakbarak paun no ikan, Jezús habosu nesesidade forte ema lubun boot ida nian ne'ebé mai atu rona Nia, ho admirasaun boot husi parte dixípulu sira-nian. Akontesimentu ne'e kontinua sai significativu mai ita: ema sira ne'ebé simu paun sira bá hasoru Jezús atu habosu de'it sira-nia hamla kona-ba Maromak; hodi rona ko'alia kona-ba Reinu, sira haluha tiha sira-nia hamla; no sira tarde atu bá han, atu bele rona Jezús kleur liután. Sira ne'ebé akompaña sira halo sira komprende katak: nein Jezús nein ema lubun boot nota buat ne'e; sira, Jezús no ema lubun boot, sira okupadu ho Maromak no nia reinu. Jezús la halo tuir dixípulu sira nia konsellu ne'ebé dudu nia atu liberta an husi ema lubun boot lahó fatin ida atu bá no lahó hahán' dixípulu sira, konxiente kona-ba sira-nia pobreza, la hatene atu

halo sá loos ho ema barak hanesan ne'e iha rai fuik ho ikan rua no paun fuan lima; sira seidauk hatene katak hodi iha Jezús sira bele konta ho milagre ne'ebé sei akontese de'it ba ema ne'ebé hadomi no milagre ida hakat liu imajinsasaun hotu.

Kazu ne'e, iha komportamentu protagonista sira-nian ita hotu iha ne'ebá. Ita haree lalais ho sira sé mak ita identifika ita-nia an no ita sei komprende saida mak sei kuran atu ita-ni aprátika eukarístika bele duni satisfás ita-nia nesesidade kona-ba Maromak no ita-nia nesesidade moris nian. Ema sira ba atu rona Jezús no balun ne'ebé presiza liu, atu husu isin-di'ak; hodi hela atu rona Nia ko'alia kona-ba Reinu no haree Nia kura ema moras sira, sira lakon sentidu tempu nian no sensasaun hamlaha nian; dixípuu sira mak preokua ho meiu sira ne'ebé ladún iha, halo atu Jezús sai konxiente kona-ba responsabilidade ne'ebé sira tenke asume. Ema lubun boot ne'ebé hetan surpresa milagre nian, la hanoin kona-ba ne'e; ho Jezús, ne'ebé ko'alia ba sira kona-ba Maromak no ninia reinu, sira la sente tan nesesidade vitál sira, hamlaha paun nian; ho Jezús, ne'ebé tau matan ba ema ne'ebé presiza nia, sira la presiza tan fatin atu hela no ai-hán.

Maibé Jezús fó ba sira: nia fó ba sira buat ne'ebé importante liu, Maromak, buat ne'ebé nesesáriu, ninia reinu; nia sei la husik sira mesak, iha rai fuik, hosi la satisfás sira nia nesesidade ai-han nian. Atu hetan milagre ki'ik, presiza iha korajen atu hakarak simu husi Nia milagre boot liu: Jezús hakbarak paun ba ema lubun boot ida ne'ebé prefere hamlaha duké moris lahó Maromak, uza nia tempu atu hetan kura iha laran, molok buka ai-han. Ita la hatene sá mak ita lakon, oinsá ita lakon atu satisfás ita-nia nesesidade ki'ik-oan sira, hodi la habosu ita-nia hamlaha ba Maromak, nesesidade kle'an no radikál kona-ba Nia no sente oinsá Nia tau matan no kura ita. Sé mak dedika an atu rona Maromak, hanesan ema lubun boot, hodi husik ba ikus nesesidade rasik, sei haree ho surpresa Maromak nia preokupasaun atu satisfás ninia nesesidade. Hodi okupa an ho Maromak nia sasán sei envolve Maromak atu preokupa ho ita-nia sasán.

Eukaristia sira ne'ebé ita partisi[pa, la iha efeitu ne'ebé ita hein, milagre ne'ebé ita presiza, tanba baibain ita tau ita-nia eziyénsia sira aas liufali Maromak nia vontade; ita okupadu liu ho buat ne'ebé ita sei kuran, nune'e ita la halo buat seluk se lae apresenta ita-nia nesesidade sira ba Maromak; no ita la husik tempu atu Nia apresenta an nu'udar resposta ba ita-nia nesesidade sira. Bá to'o Jezús, hanesan ema lubun boot atu Nia ko'alia mai ita kona-ba Maromak no halo Nia besik mai ita, mak modu efikás liu atu haree ita-nia nesesidade hetan satisfasaun, maski la sente no la husu mós! Paun ne'ebé sai barak, hetan satisfasaun ba nesesidade sira, ema ida bele hetan gratis husi Maromak se ema ne'e tau Maromak no nia reinu molok ninia hamlaha no ninia nesesidade; hodi haluha Nia ita kondena ita-nia an atu la experimenta milagre boot sira ohin loron; hodi tau ita-nia hamlaha maski la tahan loos, no ita-nia eziyénsia sira ne'ebé urjente liu, aas liu fali Maromak no iha Maromak nia oin no nia reinu, ita sei la hetan Maromak nia paun no ninia moris. Ita fila fali, hanesan ema lubun boot, atu rona Jezús no fó atensaun ba buat ne'ebé nia hanorin; no Nia sei rona fali ita-nia nesesidade no halo atu ita hetan buat ne'ebé ita presiza. Maromak ne'ebé ita fó importánsia mak Maromak ne'ebé iha atensaun.

Ita konsidera lójiku dixípulu sira-nia komportamentu, ne'ebé hakfodak ho situaun ne'ebé mosu iha kampu, bainhira loron tun ona, ho rekursu limitadu no ema lubun boot ne'ebé seidauk han. Sira nia fiar ki'ik la eskandaliza ita ka sira-nia esforsu atu haruka fila ba uma ema sira ne'ebé presiza sira-nia tulun. Iha sira-nia atitude ita hotu, Jezús nia dixípulu sira bele identifika ita-nia an: sira nia ta'uk atu atu halo buat ruma ho rekursu uitoan hatudu la iha konfiansa ba Na'i, iha nia ne'ebé, hanesan ema lubun boot, sira mós rona ninia liafuan sira. Sira hanoin katak sira iha natón de'it ba sira-nia an rasik no hanoin atu sees husi ema seluk nia nesesidade; sira nia falta iha laran-luak impede sira atu haree sira-nia mestre nia laran-luak: sira la hein milagre ida boot nune'e, tanba sira nia egoíзму boot liu hanesan mós sira-nia falta iha ai-han; tanba sira iha paun uitoan de'it iha lohu, sira la bele hakohak iha sira nia fuan ema lubun boot nia nesesidade; sira sai karak-teen, tanba sira hanoin sira kiak iha rikusoin sira, sira kuran fiar, Hanesan ita.

Hodi hakbarak sira-nia rezerva, Jezús hatudu ba nia dixípulu sira katak sira ne'ebé moris ho Nia tenke loke sira-nia ezisténsia rasik, maski kiak karik bá, ba ema seluk nia nesesidade; ita la bele moris ho Jezús hodi la sente laran susar haree ema barak nia hamlaha. Dixípulu sira haree oinsá Jezús tau matan ba ema moras sira no fó isin-di'ak, oinsá hakbesik ba ema emarjinadu sira no integra fali sira iha sosiedade, oinsá nia simu ema maksalak sira no fó fali Maromak ba sira; maibé sira ladauk aprende lisaun; sira hanoin katak sira ladauk sai ema di'ak natón atu tau halo di'ak ba ema seluk, katak sira iha soin uitoan de'it atu bele enfrenta nesesidade barabarak: sira nia fiar ne'ebé ki'ik la bele hakbarak sira nia soin ne'ebé uitoan. Maski sira bele hetan apoiu husi Jezús maibé sira la hein milagre ida husi nia.

Maski sarani sira komunga Kristu nia Isin, no hanehan tiha sira-nia nesesidade Maromak nian hodi simu paun eukarístiku, sei la serve buat ida ka serve uitoan de'it, se sira sai insensivel ba nesesidade paun nian ne'ebé ema barak ohin iha. Hanesan Jezús nia dixípulu sira, ita kontinua hanoin katak ita-nia paun no ita-nia ikan sira uitoan de'it ba ita-nia ezijénsia sira, nune'e ita laiha interese ba ema lubun boot ne'ebé la iha buat seluk se la'ós nesesidade no moris kiak. Jezú snia dixípulu, hatene katak husi nia hamlaha ba Amromak no ba paun, nia Mestre mak hatene, tenke haka'as an atu halakon ema seluk nia hamlaha. Nune'e de'it mak ita-nia komuñaun ho Kristu nia Isin no nia Moris sai efikás no kredivel : sé mak soi Maromak nu'udar ai-han, tenke fó han ba ema sira ne'ebé hamlaha. Haluha buat ne'e katak despreza Kristu nia Isin ne'ebé ita simu. Ne'e de'it.